



6. maj 2026

UPA2026/112

Kalaallit Nunaanni mittarfinnut nunanut tamalaanut atorneqartunut tamanut kalaallit erfalasuata qaqinneqartarnissaa qulakkeerneqassasoq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Siumumiit siunnersuuteqartoq Lars Poulsen, Siumut siunnersuummik saqqummiussaanut qujaffigerusupparput, taanna pisariitsunnguuvooq pingaaruteqarlunili, nunatta kinaassusianik avammut takussutissiineranik attuisooq.

Qamangavik tulluusimaarutigisaqaara kalaaliunera, naak akutaalaaraluarlunga. Inuiaammi kalaallit kinaassuserput kalaaliunerput tulluusimaarutissaraarput minnerunngitsumik piffissami tatisimaneqarnerup nalaani assorujussuaq inuiattut kinaassuserput illersorlugu pinerput ataatsimoornerput Siumumiit tulluusimaarutigeqaarput.

Siumumiilli assorujussuaq uggoraarput nunatsinni sanaartornerit annerpaartaat ingerlasimasumi, tassalu mittarfinni - nunatsinni isaavimmi soorlu Nuummi mittarfimmut tikikkaanni kalaallit erfalasualluunniit ataasinnguamilluunniit takussaaneq ajorluinnarmat. Inuiaqatigiit kalaallit akilerlugu suliarujussuaq pilersitaat kalaallit erfalasualluunniit tulluusimaarutiginnilluni pinnginneratut innera Siumumiit uparuarusukkatsigu. Taamaattumik siunnersuuteqartor Lars Poulsen Siumut qujarujussuaq inuiaqatigiinni minnerunngitsumik Naalakkersuisut ingerlatseqatigiiffiup nunatta erfalasanik atuinginnerujussuanik ersarissaagavit.

Nunatsinni mittarfiit nunanit tamalaanit atorneqartut tassaannaangillat attaveqaasersuutitigut pingaarutilinnik qitiusumik inissisimaffiit – aammali Kalaallit Nunaata avammut isikkua. Tassaniippat tikeraat amerlasuut nunatsinnut tikinnermi siullerpaamik takusaat. Taamaattumik aamma pissusissamisuuginnarpoq uagut tassani ersarissumik kinaassutsitsinnik takutitsinissaq.

Erfalatorput tassaannaangilaq katinngat. Taanna oqaluttuarisaanitsinnik, kulturitsinnik aamma namminersornermik ersersitsisuuvoq. Kalaallit inuiaqatigiit ataatsimoorluta naleqartitagut sinniisuuffigai. Erfalasoq mittarfiit nunanit tamalaanit atorneqartut eqqaanni ersarissumik erfatsillugu, nalunaarut ersarittoq nassiunneqartassaaq: Kalaallit Nunaannut tikissimavutit.

Siumut isumaqarpoq pissusissamisoortoq aamma naapertuunnerusoq erfalatorput nunatsinni mittarfiit tamarmik nunanit tamalaanit atorneqartut ilaanni aalajangersimasumik inissisimassasoq. Tamanna nunani tamalaani ileqqorineqartunut naapertuuppoq, tassani nunap ilisarnaatai killilersuiffinni angallannermilu qitiusumik inissisimaffinni ersarissumik takutinneqartarmata.

Tamatuma saniatigut maluginiarparput siunnersuut aningaasaqarnikkut annikitsuinnarnik kinguneqartussaavoq. Pineqarpoq annikitsumik aningaasaliineq isumalilli, annertuumik ilisarnaataasumik kinaassusiliinermillu naleqartoq. Tamanna Siumup pingaartitassaasutut pitsaasutut isigaa.



Siumumut siunnersuut una aamma tulluusimaaruteqarnermut tunngavoq. Nunarput kinaassuserpullu pillugit tulluusimaarneq. Aamma qulakkeerinneqataasinnaavoq tulluusimaarneq taanna ersarissumik takuneqarsinnaassasoq - uatsinnut nammineq kiisalu tikeraanut.

Tamanna tunngavigalugu Siumut siunnersuut taperserpaa.